

QVINTA PROVINCIA, H O N A N.

Nomen.



Onan Provinciae nomen dedit ipse loci situs, id enim ad Australem partem fluvii significat, quomodo ad Crocei ripam sita est, per quem ab occasu in ortum recta fluen-

Termini.

tem à Xansi & Peking provinciis separatur, licet ad orientalem partem aliquas habeat civitates ac terras, quibus ad Peking spectat. illius limites sunt ab ortu & Notapeliote Nancheli sive Nanking: ad Boream & Barapeliotem Pecheli sive Peking finitima, & quaedam Provinciae Xantung: ad Austrum ac Notolybicum Huquam: ad occidentem confinia Suchuen, reliqua Xansi terminat.

Nobilitas.

Sinae Provinciam hanc in medio mundi sitam esse asserunt: cum enim praeter suam Sinam vix alias esse terras crederent, atque hanc Provinciam in mediotulio esse Sinarum animadverterent, facile in animum induxerunt, hanc esse in orbis medio: ab antiquissimis olim temporibus saepe fuit Imperatorum sedes, electa praeter ceteris ob Crocei fluvii commoda ac incredibilem regionis amoenitatem, fecunditatemque: est haec Provincia diffusa in planiciem, partim montibus aspera, ac praecipue qua vergit magis ad occidentem; ager tamen ubique fertilis est, nullaque pars inculta, praeter eam quam montes quidam magis horridi versus occidentem occupant; sylvae in montibus sunt plurimae; frumenti, oryzae, aliarumque frugum feracissimi campi sunt, adhuc pecorum armentorumque vis haud minor; aer mitis ac temperatus salubritatem plerisque locis conciliat: celeberrimis urbibus, civitatibus, oppidis, ac castellis tota regio referta est; fluminibusque ac rivulis ita irrigua, vix ut alia huic comparari possit, multa aliunde venientia flumina excipit, multorum apud se habet scaturiginem. Fructus Europaeos prope modum omnes tanta profert copia, ut vilissimo emantur pretio, demum tanta rerum, non solum ad vitam necessarium, sed ad voluptatem facientium etiam, abundantia luxuriat, ut minime mirum sit, illam à Sinis viridarium seu hortulum vocitari: orientalis

Fertilitas.

enim illius pars adeo est amœna, tamque diligenter culta, ut multorum dierum iter conficias quasi per hortum aliquem ambules: unde mihi quandoque in mentem venit, quemadmodum Italiam Europae hortulum vocant, ita provinciam Honan huius extremae Asiae quodammodo Italiam dici posse.

Liber Sinicus, qui capitum censum continet, notat in hac provincia familias 589, 296. Viros vero 5106270. tributum tritici vel oryzae est faccorum 2414477. byssi non laboratae libras solvit 23509. serica confecta varii generis 9959. pannos ex gossipio, quibus tamen non ita abundat 341. fascies foeni pro pabulo equorum regionum 2288744.

Urbes ingentes numerat haec provincia octo. civitates vero centum, praeter munita ac castella, de quibus singulis infra.

Prima Urbs seu Metropolis

C A I F V N G.

Magna, dives & populo frequens, aedificiorumque splendore illustris erat Caifung urbs, quae anno MDCXLI aquis fere tota hausta fuit, postquam generose ac fortiter longam multorum mensium pertulisset obsidionem à rebellibus Sinici Imperatoris: iterum tamen jam utcumque decori pristino est restituta; abest urbs à Croceo fluvio ad duas fere leucas Austrum versus, humiliori loco sita est Pien fluvio vicina, qui eam ab ortu, Austro & occasu aluit, est autem is Crocei fluvii ramus; cum autem Crocei superficies aquae, seu perpendiculum altius sit ipsa urbe, ingentibus ex quadrato saxo structis aggeribus ad trecenta & plura stadia aquas continent, earumque periculum ab urbe avertunt: ac tuta quidem omnino illa fuisset, nisi data opera aggeres à militibus fuissent effracti, qui rebelles urbem obsidio prementes aquis mergere cogitabant; sed urbem ipsam eluvio ac ruina involvit, unaque cum ipsa urbe & templum & sacerdotem è Societate nostra.

Urbis huius territorium Yvus Imperator in duas distribuerat provincias, pars una provinciae Yen, altera pars Yu accensebatur:

Tributum.